

**Kerjasama bursa ASEAN tawar lebih manfaat  
Utusan Online  
31 Mei, 2012**

KUALA LUMPUR 30 Mei - Kerjasama Rangkaian Dagangan ASEAN antara bursa-bursa saham yang menekankan konsep 'pasaran tunggal, manfaat berganda' dapat menawarkan lebih banyak faedah berbanding cabaran kepada pembentukannya.

Ketua Pegawai Eksekutif Bursa Malaysia, Datuk Tajuddin Atan berkata, salah satu manfaat pembentukan rangkaian itu adalah negara-negara ASEAN sendiri mempunyai profil simpanan runcit yang besar serta menawarkan peluang pelaburan yang tinggi.

Malah, katanya, setiap bursa saham di negara-negara ASEAN juga dapat mencipta pasaran saling memerlukan dan saling belajar dari kesilapan di antara satu sama lain.

"ASEAN kini dijangka mempunyai 245 broker saham dan 24,195 remisier yang dapat menjelaskan potensi kerjasama di antara bursa-bursa saham.

"Kita sedang berusaha untuk mencipta pasaran yang memberi faedah kepada semua pelabur ASEAN," katanya.

Beliau berkata demikian sewaktu ditemui selepas menghadiri sesi plenari Invest Malaysia bertajuk 'Komuniti ekonomi ASEAN: pasaran tunggal manfaat berganda' di Invest Malaysia 2012 di sini hari ini.

Turut menjadi ahli panel pada sesi plenari itu ialah Pengerusi Suruhanjaya Sekuriti, Datuk Ranjit Ajit Singh, Bekas Setiausaha Persekutuan Bursa-Bursa Dunia, Thomas Krantz dan Profesor Renmin University of China, Dr. Zhao Xi Jun.

Ketika ditanya mengenai perkembangan kerjasama rangkaian dagangan Bursa Malaysia dengan Bursa Singapura (SGX) dan Bursa Thailand (SET) sebagai permulaan kerjasama rangkaian dagangan ASEAN, Tajuddin memberitahu, rangkaian dagangan di antara Bursa Malaysia dengan SGX akan dibentuk pada akhir Jun ini dan kerjasama dengan SET pada Ogos depan.

Katanya, pada waktu ini, pihaknya perlu memastikan sistem pasaran yang stabil sebelum melaksanakan kerjasama di antara kedua-dua negara.

"Kami perlu melakukan kajian dan pemantauan terhadap terma pasaran semasa terlebih dahulu yang mengambil sedikit masa," ujarnya.

Sementara itu, Ranjit Ajit berkata, terdapat peluang dalam pasaran modal menerusi kerjasama di antara negara anggota ASEAN dan inisiatif untuk memperkenalkan satu pasaran tunggal.

Hakcipta Terpelihara © UTUSAN MELAYU (M) BERHAD

Source:

[http://www.utusan.com.my/utusan/info.asp?y=2012&dt=0531&pub=Utusan\\_Malaysia&sec=Ekonomi&pg=ek\\_02.htm](http://www.utusan.com.my/utusan/info.asp?y=2012&dt=0531&pub=Utusan_Malaysia&sec=Ekonomi&pg=ek_02.htm)

